

優等獎

憶臺北故居四首並序

吳俊男

余曾卜居臺北市老公寓，其所乃曩昔北一女教師宿舍，外牆斑駁，紅磚雖老，別具古味。一九重葛自地攀至三樓，青翠可人，長年皆花，紅綠交錯，美不勝收。前庭有圍牆隔道，內有楓桂數株，皆已數十年載，余復於其間植國梅一株，後陽臺植唐竹八株，是以四季皆有可翫之處，雖居大城，亦有三徑之樂也。遷居四年多矣，近日天寒，頗憶故居生活，乃賦詩以記之。

其一

九重葛葉掩雞窗，稍隔紅塵車馬塵。
錯落花光映長案，輕盈蝶影舞微缸。
魏碑臨練難神得，勁句推敲欲鼎扛。
大隱鵬城心尚古，偏憐雅事厭時腔。

註：韓愈〈病中贈張十八〉詩：「龍文百斛鼎，筆力可獨扛。」

其二

落地窗前竹影橫，隨風搖曳妙姿生。
猗猗枝葉招晴日，炳炳琅玕勝豔英。
高節真堪群士比，虛心能納百川傾。
午間臥看得佳趣，一任塵囂闐北城。

其三

楓紅漸落已深秋，庭桂清香漫月樓。
豈逐潮流歌鄭衛？常耽詩句慕曹劉。
涼宵擲管走棉紙，陋室披書銜茗甌。
材譎難逢長者轍，何妨網路作賡酬？

其四

朔風凜凜襲三臺，忽放牆邊一樹梅。
喜剪瑤枝移斗室，漫由香氣佐新醅。
夜深京輦街猶鬧，心靜縑緗藻更瑰。
且藉奇詩出寰宇，塵中歲月莫相催。